

Na osnovu člana 50.tačka b) Zakona o visokom obrazovanju („Sl. novine TK, broj:7/16,10/16, 5/17 i 15/17) , te člana 50. stav (1) Statuta Univerziteta u Tuzli, Upravni odbor Univerziteta u Tuzli na sjednici održanoj dana 04.09.2018.godine donio je

PRAVILNIK O USLOVIMA, KRITERIJIMA I POSTUPKU PRIJEMA STUDENATA U STUDENTSKE DOMOVE STUDENTSKOG CENTRA UNIVERZITETA U TUZLI

I OPŠTE ODREDBE

Član 1.

Pravilnikom o uslovima kriterijima i postupku prijema studenata u studentske domove Studentskog centra Univerziteta u Tuzli (u daljem tekstu: Pravilnik) uređuju se: uslovi, kriteriji, postupak i organi nadležni za prijem studenata u studentske domove Studentskog centra Univerziteta u Tuzli; smještaj studenata u studentske domove; otkaz ugovora o prijemu studenata u studentske domove Studentskog centra Univerziteta u Tuzli (u daljem tekstu: Studentski centar).

II USLOVI ZA PRIJEM STUDENATA U STUDENTSKE DOMOVE

Član 2.

(1)Pravo na prijem u studentske domove Studentskog centra imaju redovni studenti Akademije i fakulteta Univerziteta u Tuzli (u daljem tekstu: fakultet) pod slijedećim uslovima:

- da su prvi put upisali prvu, odnosno narednu godinu studija;
 - da je mjesto njihovog prebivališta, odnosno boravišta udaljeno od Tuzle više od 15 kilometara.
- (2)Student kojem je u tekućoj školskoj godini izrečena disciplinska mjera isključenja sa fakulteta ili isključenje iz studentskog doma ne može biti primljen u studentski dom u narednoj školskoj godini.

Član 3.

(1)Ukoliko se smještajni kapaciteti u studentskim domovima ne popune redovnim studentima koji prvi put upisuju prvu, odnosno narednu godinu studija, pravo na prijem u studentske domove imaju redovni studenti koji obnavljaju godinu, kao i studenti u statusu studenta apsoluta, te redovni studenti upisani na II ciklus studija i to po punoj ekonomskoj cijeni u iznosu od 280 KM, ukoliko koriste smještaj i ishranu, odnosno po cijeni u iznosu od 105 KM, ukoliko koriste samo smještaj.

(2)Prijem redovnih studenata koji obnavljaju studijsku godinu na nepopunjena mjesta u studentskim domovima vrši se na način i po postupku utvrđenom članovima 6. – 8. ovog Pravilnika.

(3)U toku ljetnog raspusta, u domu se mogu smjestiti razna sportska, kulturna ili druga udruženja i druga lica, po cijeni koju posebnom odlukom utvrdi Upravni odbor Univerziteta, na prijedlog direktora Studentskog centra, uz prethodno pribavljeno mišljenje rektora Univerziteta.

III KRITERIJI ZA PRIJEM STUDENATA U STUDENTSKE DOMOVE

Član 4.

(1)Rangiranje studenata za prijem u studentske domove vrši se na osnovu slijedećih kriterija:

- | | |
|---|-----------|
| 1) uspjeh u studiju | 40 bodova |
| 2) materijalni položaj | 35 bodova |
| 3) pravo prioriteta pri smještaju | 25 bodova |

(2)Maksimalan broj bodova po osnovu utvrđenih kriterija iznosi 100 bodova.

Član 5.

Po kriteriju „uspjeh u studiju“ studentu pripada slijedeći broj bodova:

- za ostvarenu prosječnu ocjenu 9,0 do 10 u prethodnoj godini studija, odnosno prosječnu ocjenu 5,0 u srednjoj školi za studente prve godine 40 bodova
- za ostvarenu prosječnu ocjenu 8,0 do 8,9 u prethodnoj godini studija, odnosno prosječnu ocjenu 4,0 do 4,9 u srednjoj školi 30 bodova
- za ostvarenu prosječnu ocjenu 7,0 do 7,9 u prethodnoj godini studija, odnosno prosječnu ocjenu 3,0 do 3,9 u srednjoj školi 20 bodova
- za ostvarenu prosječnu ocjenu 6,0 do 6,9 u prethodnoj godini studija, odnosno prosječnu ocjenu 2,0 do 2,9 u srednjoj školi 10 bodova.

Član 6.

(1) Po kriteriju „materijalni položaj“ studentu pripada slijedeći broj bodova:

- bez prihoda po članu užeg porodičnog domaćinstva..... 35 bodova
- student iz porodice korisnika socijalne pomoći..... 30 bodova
- prihodi po članu užeg porodičnog domaćinstva do 30 % od prosječne plate u Federaciji BiH..... 25 bodova
- prihodi po članu užeg porodičnog domaćinstva od 31 %-50% od prosječne plate u Federaciji BiH..... 20 bodova
- prihodi po članu užeg porodičnog domaćinstva od 51 %-70% od prosječne plate u Federaciji BiH..... 15 bodova
- prihodi po članu užeg porodičnog domaćinstva preko 70 % od prosječne plate u Federaciji BiH..... 5 bodova.

(2) Prilikom primjene ovog kriterija, u obzir se uzima prosječna plata u F BiH prema posljednjem objavljenom podatku Federalnog zavoda za statistiku.

(3) Pod članovima užeg porodičnog domaćinstva, u smislu ovog Pravilnika, podrazumijevaju se: roditelji, braća i sestre, a ako je student u braku: braćni drug i djeca.

Član 7.

(1) Po kriteriju „prioriteta pri smještaju“ studentu pripada slijedeći broj bodova:

- studentu RVI:
 - invalidnost od 70% - 100% 25 bodova
 - invalidnost od 50% - 69% 20 bodova
- studentu iz porodice RVI:
 - invalidnost od 70% - 100% 20 bodova
 - invalidnost od 50% - 69% 15 bodova
 - invalidnost do 50% 10 bodova
- studentu iz porodice šehida ili poginulog borca 20 bodova
- studentu civilni/mirnodopski vojni invalid:
 - invalidnost od 70% - 100% 20 bodova
 - invalidnost od 50% - 69% 15 bodova
 - invalidnost do 50% 10 bodova
- studentu demobilisanom borcu oružanih snaga BiH 10 bodova
- studentu iz porodice demobilisanog borca oružanih snaga BiH 5 bodova
- student koji ima status izbjeglog ili raseljenog lica 10 bodova

(2) Po kriterijima iz prethodnog stava student može ostvariti, po svim osnovama najviše 25 bodova.

(3) Studentu bez roditeljskog staranja 60 bodova.

Član 8.

U slučaju ostvarenog istog broja bodova na rang listi, prednost pri prijemu student ostvaruje po slijedećem redoslijedu:

- student iz porodice šehida ili poginulog borca;
- student RVI ili student iz porodice RVI sa većim procentom invalidnosti pri čemu se uzima u obzir stepen invalidnosti od 60% do 100%;
- student lošijeg materijalnog položaja;
- student demobilisani borac oružanih snaga BiH ili student iz porodice demobilisanog borca oružanih snaga BiH.
- student koji je ostvario veću prosječnu ocjenu.

IV POSTUPAK I ORGANI NADLEŽNI ZA PRIJEM STUDENATA U STUDENTSKE DOMOVE

Član 9.

(1) Prijem studenata u studentske domove vrši se na osnovu javnog konkursa, koji za svaku akademsku godinu raspisuje Senat Univerziteta u Tuzli (u daljem tekstu: Univerzitet) najkasnije do 5. septembra tekuće godine.

(2) Konkurs se objavljuje u sredstvima javnog informisanja i na Web stranici Univerziteta.

(3) Konkurs ostaje otvoren 15 dana od dana objavljivanja.

(4) Ugovor između studenta i Studentskog centra se zaključuje počev od 01. oktobra tekuće godine, a zaduživanje studenata dva dana prije početka nove akademske godine.

Član 10.

(1) Konkurs za prijem studenata sadrži:

- broj studenata koji se, prema raspoloživim kapacitetima Studentskog centra, može primiti u narednoj školskoj godini;
- uslove za prijem u studentske domove;
- rok za podnošenje prijave na konkurs;
- dokumentaciju koja se prilaže uz prijavu.

(2) Uz prijavu na Konkurs kandidat je dužan dostaviti slijedeću dokumentaciju:

1. uvjerenje da je redovan student Univerziteta,
2. potvrdu o mjestu prebivališta, odnosno boravišta (CIPS-ov dokument – kopija)
3. uvjerenje o prosječnoj ocjeni ostvorenoj u prethodnoj godini studija, odnosno u srednjoj školi za studenta prve godine studija;
4. uvjerenje o zajedničkom domaćinstvu (kućna lista);
5. potvrdu o prosječnoj plaći za svakog zaposlenog člana užeg porodičnog domaćinstva ostvorenoj u posljednja tri mjeseca, odnosno ovjerena fotokopija tri zadnja čeka za svakog člana užeg porodičnog domaćinstva koji primaju penziju,
6. uvjerenje za članove užeg porodičnog domaćinstva koji se nalaze na evidenciji Zavoda za zapošljavanje;

(3) Za ostvarivanje benefita pri bodovanju i rangiranju, student u zavisnosti o pripadnosti nekoj od slijedećih kategorija, dostavlja i :

1. uvjerenje da je student član porodice koja ostvaruje stalnu novčanu pomoć i visini te pomoći/da je bez roditeljskog staranja;
2. uvjerenje da je student izbjeglo i raseljeno lice;
3. uvjerenje da je student iz porodice šehida ili poginulog borca;
4. uvjerenje da je student RVI ili član porodice ratnog vojnog invalida sa procentom invalidnosti;
5. uvjerenje da je student invalid ili član porodice invalida sa procentom invalidnosti;
6. uvjerenje o učešću u oružanim snagama BiH studenta ili člana užeg porodičnog domaćinstva;
7. Izvod iz matične knjige umrlih za slučaj iz člana 7. stav (3) ovog Pravilnika.

Član 11.

- (1) Prijave na konkurs sa potrebnom dokumentacijom podnose se tehničkom sekretaru Studentskog centra.
- (2) Student kojem je u tekućoj školskoj godini izrečena disciplinska mjera za težu povredu obaveze nema prava učešća na konkursu.
- (3) Student koji do dana objavljivanja konkursa nije izmirio svoje ugovorene obaveze iz tekuće i prethodnih školskih godina prema Studentskom centru nema pravo učešća na konkursu.

Član 12.

Neblagovremene i nepotpune prijave ne uzimaju se u razmatranje.

Član 13.

Studenti viših studijskih godina u obavezi su najkasnije do 15.10. tekuće godine priložiti uvjerenje o upisu na fakultet u narednu akademsku godinu, a u suprotnom gube pravo na smještaj.

Član 14.

- (1) Postupak prijema studenata u studentske domove provodi komisija koju imenuje Senat Univerziteta.
- (2) Komisija se sastoji od 5 (pet) članova, od kojih su 3 (tri) iz reda zaposlenika i 2 (dva) iz reda studenata.

Član 15.

- (1) Komisija vrši svoje nadležnosti na sjednicama koje saziva predsjednik, kojeg biraju članovi Komisije iz reda svojih članova.
- (2) Bliže odredbe o načinu sazivanja sjednica, radu i načinu donošenja odluka utvrđuju se Poslovníkom o radu Komisije.

Član 16.

Komisija za prijem studenata u studentske domove je stalna komisija Senata i ima slijedeće nadležnosti:

- planira raspodjelu kapaciteta Studentskog centra namijenjenih za stanovanje studenata, po kriterijima utvrđenim ovim Pravilnikom;
- utvrđuje prijedlog teksta Konkursa za popunu smještajnih kapaciteta, sa kriterijima i uslovima za apliciranje zainteresovanih studenata i utvrđuje Rang listu prijavljenih kandidata;
- objavljuje prijedlog Rang liste, razmatra prigovore na istu, te utvrđuje i objavljuje konačnu Rang listu, koja predstavlja osnov za prijem u domove Studentskog centra;
- vrši i druge poslove utvrđene Statutom i opštim aktom, kojim se uređuju pitanja prijema studenata u studentske domove, odnosno korištenje smještajnih kapaciteta Studentskog centra.

Član 17.

- (1) Na osnovu konačne Rang-liste zaključuje se ugovor o prijemu studenta u studentski dom kojim se, u skladu sa ovim Pravilnikom i drugim opštim aktom Univerziteta, bliže uređuju međusobna prava i obaveze Studentskog centra i studenta.
- (2) Tekst ugovora utvrđuje direktor Studentskog Centra, uz prethodnu saglasnost Rektora.
- (3) Prilikom zaključivanja Ugovora student je dužan priložiti ljekarsko uvjerenje koje ne može biti starije od 6 mjeseci, a student prve godine studija fotokopiju ljekarskog uvjerenja predatog studentskoj službi Univerziteta, kao i tri fotografije formata 3 x 4 cm.

V SMJEŠTAJ STUDENATA U STUDENTSKE DOMOVE

Član 18.

- (1) Na osnovu zaključenog Ugovora, a najkasnije u roku od 5 dana od dana njegovog

zaključivanja, vrši se pojedinačano zaduživanje i useljavanje studenata u studentske domove.

(2)Ukoliko se u roku iz prethodnog stava ovog člana student ne javi u Studentski centar radi zaduživanja i useljavanja smatrat će se da je otkazao Ugovor.

(3)U slučaju iz prethodnog stava, u daljem roku od 5 dana zadužit će se slijedeći student sa konačne Rang liste.

(4)Danom useljenja u studentski dom student dobiva status studenta stanara studentskog doma.

Član 19.

Studentski dom student koristi od dana zaključivanja Ugovora do isteka junsko-julskog ispitnog roka, odnosno do 15.07. tekuće godine.

Član 20.

(1)Student koji je smješten u studentski dom obavezan je plaćati usluge smještaja i ishrane/smještaja, u skladu sa članom 3. Pravilnika, izuzev studenata članova Komisije za prijem studenata u studentske domove.

(2)Izuzetno, na zahtjev Studentskog parlamenta i Udruženja studenata Studentskog centra Univerziteta u Tuzli „Studenjak“, u cilju poboljšanja studentskog standarda i potreba Studentskog parlamenta ili US „Studenjak“, odnosno prilikom organizovanja manifestacija od interesa za Univerzitet, razmjene studenata, po osnovu međunarodne saradnje, direktor Studentskog centra, uz prethodnu pismenu saglasnost Rektorice može odobriti besplatan smještaj za studente.

Član 21.

(1)U slučaju da student ne koristi usluge smještaja u studentskom domu duže od 8 dana uzastopno, dužan je o razlozima odsustva obavijestiti direktora Studentskog centra u daljem roku od 3 dana .

(2)Ako student ne postupi u skladu sa stavom 1. ovog člana i po povratku ne pruži valjan dokaz o opravdanosti svog odsustva (bolest i sl.) ugovor će se otkazati.

Član 22.

(1)Studenti koji su po osnovu zaključenog govora za tekuću školsku godinu koristili dom, mogu koristiti usluge smještaja u studentskom domu putem recepcije, u toku trajanja ljetnog raspusta, u skladu sa članom 3. Stav (1) ovog Pravilnika.

(2)Direktor Studentskog centra, na prijedlog Studentskog parlamenta Univerziteta i Udruženja studenata Studentskog centra Univerziteta u Tuzli „Studenjak,“ utvrdit će raspored korištenja recepcijskog smještaja u smislu st. 1. ovog člana.

(3)Smještaj putem recepcije ne mogu koristiti studenti kojima je u tekućoj školskoj godini izrečena jedna od disciplinskih mjera.

Član 23.

(1)Za vrijeme korištenja smještaja putem recepcije student plaća naknadu čiju visinu posebnom Odlukom utvrđuje Upravni odbor Univerziteta, na prijedlog direktora Studentskog centra .

(2)Naknada iz stava 1. ovog člana ne može biti manja od ukupnih tekućih troškova.

VI OTKAZ UGOVORA

Član 24.

Ugovor o prijemu studenata u studentske domove otkazat će se:

- ako se student u utvrđenom roku ne javi radi zaduživanja i useljavanja;
- ako studentu prestane status studenta na Univerzitetu;
- ako student neopravdano ne koristi smještaj duže od 8 dana uzastopno;
- ako mu bude izrečena disciplinska mjera isključenja iz studentskog doma ili mjera isključenja sa fakulteta;
- ako do 15-og u mjesecu ne plati troškove smještaja i ishrane za prethodni mjesec:

- u drugim slučajevima utvrđenim ovim Pravilnikom.

VII PRELAZNE I ZAVRŠNE ODREDBE

Član 25.

Odredba člana 3. stav (3) ovog Pravilnika primjenjivati će se nakon što Upravni odbor Univerziteta posebnom odlukom utvrdi cijenu smještaja i početak primjene iste.

Član 26.

Ovaj Pravilnik stupa na snagu danom donošenja, a primjenjivati će se od akademske 2018/19. godine.

UNIVERZITET U TUZLI
Broj: 04-4662-2/18
Tuzla, 04.09.2018.godine

PREDSJEDNIK UPRAVNOG ODBORA
Amir Šabačkić, dipl.inž.el.